

U skladu sa članom 7. stav (2) Zakona o kolektivnom ostvarivanju autorskog i srodnih prava (Službeni glasnik BiH 63/10), članom 24, članom 48 i članom 45. Statuta Asocijacije kompozitora – muzičkih stvaralaca, Skupština Asocijacije kompozitora – muzičkih stvaralaca (u daljem tekstu: Udruženje) na svojoj sjednici održanoj 13.05.2026. godine donosi:

PRAVILNIK O FONDU ZA KULTURNE I SOCIJALNE NAMJENE ASOCIJACIJE KOMPOZITORA – MUZIČKIH STVARALACA

Opće odredbe

Član 1.

Pravilnikom o Fondu za kulturne i socijalne namjene (U daljem tekstu: Pravilnik) utvrđuju se uslovi, postupak, način prikupljanja sredstava, raspored i korištenje sredstava i ostvarivanje prava na sredstva iz Fonda za kulturne i socijalne namjene Udruženja (u daljnjem tekstu: Fond).

Član 2.

Fond čine sredstva koja se odlukom Skupštine Udruženja izdvajaju od naplaćene autorske naknade, odnosno tantijema autora i nosilaca prava za kulturne namjene i za unapređenje penzijskog, zdravstvenog i socijalnog statusa članova Udruženja, a na temelju Člana 7. stav (2) Zakona o kolektivnom ostvarivanju autorskog i srodnih prava (Službeni glasnik BiH 63/10).

Član 3.

- (1) Visina sredstava Fonda ne smije biti veća od 10% neto prihoda Udruženja.
- (2) Odluku o visini sredstava iz Fonda na godišnjem nivou donosi Skupština Udruženja na svojim redovnim zasjedanjima.
- (3) Sredstva prikupljena za prethodnu kalendarsku godinu ulaze u masu za dodjelu iz sredstava Fonda u tekućoj kalendarskoj godini.
- (4) Omjer između sredstava određenih za kulturne i socijalne namjene može se mijenjati u okviru kalendarske godine u zavisnosti od potreba Udruženja.

Član 4.

- (1) Sredstvima Fonda upravlja Upravni odbor.
- (2) O korištenju sredstava iz Fonda Upravni odbor Skupštini Udruženja podnosi godišnji izvještaj.

Dodjela sredstava iz Fonda za kulturne namjene

Član 5.

(1) Upravni odbor raspisuje konkurs za dodjelu sredstava iz Fonda za kulturne namjene i objavljuje ga na službenoj web stranici Udruženja.

(2) Oblasti i kriteriji koji su obuhvaćeni konkursom:

- Muzičko stvaralaštvo (stimulacija domaćeg muzičkog stvaralaštva);
- Muzičke manifestacije (organizovanje festivala, tribina posvećenih novim djelima i naučnih skupova čija je tematika od značaja za domaće muzičko savremeno i tradicionalno stvaralaštvo);
- Muzičko izdavačko stvaralaštvo (izdavanje promotivnih kompakt diskova iz oblasti klasične, džez, dječije, tradicionalne ili duhovne muzike, objavljivanje partitura od značaja za muzičku kulturu, objavljivanje analitičkih studija i stručnih muzikoloških publikacija koje su od značaja za domaće muzičko stvaralaštvo).

Član 6.

(1) Odluku o dodjeli sredstava iz Fonda za kulturne namjene donosi Upravni odbor.

(2) Nepotpune prijave iz Člana 5. stava (4) ovog Pravilnika, odnosno prijave koje ne sadrže potrebnu prateću dokumentaciju iz člana 5. stav (5) ovog Pravilnika, Upravni odbor neće razmatrati.

(3) Pri donošenju odluke o raspodjeli sredstava posebno će se voditi računa o:

- ukupnoj masi sredstava koja je u trenutku odlučivanja prikupljena u Fond;
- da se konkursna prijava odnosi na područje domaćeg umjetničkog i kulturnog stvaralaštva, njegovanja muzičke tradicije, aktivnosti autora, muzičke djelatnosti uopće, vodeći računa o izvrsnosti i kvaliteti, žanrovskoj muzičkoj raznolikosti i regionalnoj zastupljenosti;

(4) Odluka Upravnog odbora je konačna.

Član 7.

(1) Krajnji rok za realizaciju programa/projekta je 30. novembar naredne godine.

(2) Rok za pravdanje troškova realizacije programa/projekata je 31. decembar naredne godine.

(3) Ukoliko podnosilac programa/projekta do 31. decembra naredne godine ne opravda utrošena sredstva, u obavezi je da cjelokupan iznos vrati Udruženju.

(4) U slučaju posebno opravdanog i dokazanog razloga, a po dobijenoj odluci Upravnog odbora, može se produžiti navedeni rok.

Ukoliko podnosilac programa/projekta ne preuzme dobijena sredstva, ne može ih potraživati nakon isteka roka iz stava (1) ovog člana.

Dodjela sredstava iz Fonda za socijalne namjene

Član 8.

(1) Pravo na sredstva za socijalne namjene iz Fonda imaju svi članovi Udruženja koji su, po osnovu zdravstvene ugroženosti ili po osnovu egzistencijalne ugroženosti. Pravo na sredstva za socijalne namjene iz Fonda imaju i najbliži članovi porodice preminulog člana Udruženja, pod uslovima predviđenim ovim Pravilnikom.

(2) Sredstva iz prethodnog stava dodjeljuju se u vidu novčane pomoći (u daljem tekstu: Pomoć).

(3) Pomoć se članu Udruženja može odobriti samo jednom u toku kalendarske godine i to samo po jednom od osnova iz stava (1) ovog člana.

(4) Pomoć se članu Udruženja može odobriti samo ako njegovo članstvo u Udruženju traje najmanje 3 (tri) godine od momenta podnošenja zahtjeva, u kontinuitetu.

(5) Pomoć se može odobriti samo članovima Udruženja koji na godišnjem nivou ostvare iznos tantijema preko 1.000,00 KM.

(6) Izuzetno od odredbe stava (5) ovog člana, Pomoć se može odobriti i članu Udruženja koji ne ispunjava uslov minimalnog iznosa tantijema, ukoliko nadležni organ Udruženja, na osnovu diskrecione ocjene i uzimajući u obzir naročito tešku zdravstvenu ili egzistencijalnu situaciju podnosioca zahtjeva, ocijeni da za to postoje opravdani razlozi.

Član 9.

(1) Pravo na pomoć članu Udruženja na temelju zdravstvene ugroženosti može se tražiti u slučajevima: iznenadne i teške bolesti, bolesti koja zahtjeva skupo liječenje ili hirurški zahvat, bolesti koja zahtjeva kupovinu ortopedskih pomagala.

(2) Zahtjev za pomoć iz Fonda na temelju zdravstvene ugroženosti se podnosi u pisanoj formi koja, između ostalog, sadrži: preciznu dijagnozu sa potpisom i pečatom ljekara specijaliste, stručno mišljenje ljekara o težini oboljenja, prognozu razvoja i eventualnog izlječenja bolesti, ne stariju od 6 mjeseci.

(3) Ukoliko se zahtjev iz stava (2) ovog člana odnosi na dvije ili više bolesti iz stava (1) ovog člana Pravilnika, pomoć će se dodijeliti isključivo za jednu bolest, i to onu koja prema odredbama ovog Pravilnika ima najveću težinu.

Član 10.

(1) Pravo na pomoć članu Udruženja na temelju egzistencijalne ugroženosti može se tražiti ukoliko je član Udruženja nezaposlen, ili ukoliko je prihod koji ostvaruje manji od mjesečnog iznosa najniže penzije na nivou Bosne i Hercegovine, ili ukoliko je pomoć potrebna za saniranje i ublažavanje posljedica elementarne nepogode.

(2) Zahtjev za pomoć iz Fonda na temelju egzistencijalne ugroženosti se podnosi u pisanoj formi koja, između ostalog, sadrži: potvrdu o statusu (potvrda o nezaposlenosti, ček od penzije, rješenje o invalidnini), podatke o ukupnim prihodima i imovini člana, dokaze o nastaloj šteti, a za slučaj potrebe saniranja i ublažavanja posljedica elementarne nepogode.

(3) Visina pomoći na temelju egzistencijalne ugroženosti u svakom pojedinačnom slučaju ne može biti veća od 6 (šest) prosječnih neto plata u BiH, prema posljednjim objavljenim podacima Agencije za statistiku Bosne i Hercegovine, u odnosu na dan odlučivanja o zahtjevu.

Član 11.

(1) Odluku o dodjeli sredstava iz Fonda za socijalne namjene donosi Upravni odbor.

(2) Nepotpune zahtjeve iz člana 9. i člana 10. ovog Pravilnika, odnosno zahtjeve koji ne sadrže potrebnu prateću dokumentaciju, Upravni odbor neće razmatrati.

(2) Pri donošenju odluke o raspodjeli sredstava posebno će se voditi računa o:

- penzionom, zdravstvenom i socijalnom statusu članova Udruženja,;
- ranije odobrenim sredstvima korisnicima koji apliciraju više puta, pri čemu Upravni odbor može odbiti zahtjev iz člana 7. i/ili člana 8. ovog Pravilnika ukoliko su korisniku ranije odobrena sredstva najmanje 3 puta.

(3) Ukoliko se zahtjev odnosi na isplatu pomoći članu Udruženja na temelju zdravstvene ugroženosti, Upravni odbor je dužan da visinu pomoći odredi prema Klasifikaciji težine bolesti koja predstavlja Prilog 1 ovog Pravilnika, imajući u vidu i visinu iznosa koji je član svojim zahtjevom tražio. U klasifikaciji težine bolesti su navedena oboljenja razvrstana prema kategorijama, sa šiframa označenim u skladu sa Međunarodnom klasifikacijom bolesti i za svaku kategoriju je propisan maksimalni iznos koji Upravni odbor može odobriti. U slučaju da se zahtjev odnosi na bolest koja je obuhvaćena članom 9. stav (1) ovog Pravilnika, ali koja eventualno nije sadržana u Klasifikaciji težine bolesti, Upravni odbor će takav zahtjev uzeti u razmatranje, odnosno isti neće odbiti, te će, vodeći se principom ekvivalentnosti u odnosu na bolesti sadržane u Klasifikaciji težine bolesti, odrediti adekvatnu visinu pomoći.

(4) Ukoliko se zahtjev odnosi na isplatu pomoći članu Udruženja na temelju egzistencijalne ugroženosti, Upravni odbor je dužan da visinu pomoći odredi prema Kriterijima egzistencijalne ugroženosti koji predstavljaju Prilog 2 ovog Pravilnika, imajući u vidu i visinu iznosa koji je član svojim zahtjevom tražio. Odredbom člana 8. stav (3) ovog Pravilnika propisan je maksimalni iznos pomoći na temelju egzistencijalne koji Upravni odbor može odobriti.

(3) Odluka Upravnog odbora je konačna.

Član 12.

(1) U slučaju smrti člana Udruženja, isplata novčanih sredstava na ime troškova sahrane i novčane pomoći najbližim članovima njegove porodice vrši se iz Fonda.

(2) Maksimalan iznos sredstava iz stava (1) ovog člana na ime troškova sahrane, u svakom pojedinačnom slučaju iznosi 2.000 KM neto.

(3) Odluku o visini sredstava iz stava (2) ovog člana donosi Upravni odbor.

(4) Novčana pomoć iz stava (1) ovog člana za maloljetno dijete preminulog člana Udruženja, isplaćuje se mjesečno, sve do kraja redovnog školovanja djeteta, odnosno do njegovog punoljetstva, u iznosu od 300,00 KM neto.

Završne odredbe

Član 13.

(1) Sredstva iz Fonda koja nisu utrošena u toku jedne kalendarske godine moguće je prenijeti na sljedeću godinu.

(2) Upravni odbor preostala sredstva može usmjeriti u namjene predviđene ovim Pravilnikom.

(3) Izuzetno od prethodnog stava ovog člana, Upravni odbor preostala sredstva može usmjeriti u raspodjelu svojim članovima.

Član 14.

Ovaj Pravilnik stupa na snagu danom donošenja.
Stupanjem na snagu ovog Pravilnika stavlja se van snage prethodni Pravilnik o Fondu za kulturne i socijalne namjene.

Broj: P-01/26

Sarajevo, 13.05.2026. godine



Ranko Boban
Predsjednik Skupštine AMUS-a
Ranko Boban

PRILOG 1 – KLASIFIKACIJA TEŽINE BOLESTI

Prva kategorija

- Kamen u žučnoj kesi ili u žučnim putevima/Calculus vesicae fellae K80 ili stanje nakon operacije kamena;
- Kile/Hernia inguinalis, femoralis, ventralis K40 ili stanje nakon operacije kile;
- Stanje nakon operacije slijepog crijeva Appendectomy K35;
- Korekcija vida staklima za korekciju, senilna katarakta za koju se čeka operacija ili operisana katarakta/Cataracta sen H25;
- Alergijska kihavica/Rhinitis allergica, vasomotoria J30.

Druga kategorija

- Hipertenzija, povišene vrijednosti krvnog pritiska, bez poznatog uzroka i bez komplikacija /HTA ess I10;
- Povišene vrijednosti nivoa glukoze u krvi koje još uvijek nisu šećerna bolest/Intolerantio glucosae r73;
- Inzulinska rezistencija dokazana laboratorijskim analizama;
- Povišene masnoće u krvi/Hyperlipidaemia E78;
- Masna, steatozna jetra/Steatosis hepatis K76;
- Anksioznost F41;
- Prelomi ekstremiteta koji su liječeni gips imobilizacijom bez operativnog liječenja;
- Hemoroidi koji krvare i zahtijevaju liječenje/Haemorrhoides I84;
- Tegobe u gornjim partijama digestivnog trakta tipa gorušice, pojačane kiseline, osjećaja punoće u želici, nadutosti/Dyspepsia K30.

Treća kategorija

- Hipertenzija, tj. povišen krvni pritisak gdje postoje hipertenzivne krize koje zahtijevaju konzultaciju ljekara i rezistentne hipertenzije;
- Hipertenzija kod koje je ultrazvučnim pregledom srca utvrđeno da postoji hipertrofija odnosno uvećanje lijeve komore srca;
- Hipertenzija kao posljedica drugog oboljenja, sekundarne hipertenzije;
- Poremećaji ritma srca koji se regulišu tabletama (tahikardije, SVES, VES, aritmija apsoluta)/Arrhythmiae cordis I47, I48, I49, R00;
- Šećerna bolest tipa 2 sa terapijom oralnim preparatima/DM tip 2 E11;
- Refluksna bolest i erozije jednjaka/GERB K21 dokazana gastroskopijom;
- Čir, grizlica/Ulcus na želucu ili dvanaestopalačnom crijevu K25, K26;
- Hašimoto tireoiditis (dokazan sa povišenim vrijednostima antitijela, poremećajem u vrijednostima tiroidnih hormona, sa urađenim ultrazvučnim pregledom, bez indikacija za operativno liječenje) E06;
- Povišen očni pritisak /Glaucoma H40;
- Glavobolje koje zahtijevaju intervenciju ljekara (migrene, glavobolje s mučninom, fotofobijom) G43, G44;
- Bolovi u leđima, u vratnom, grudnom, lumbalnom dijelu leđa/Dorsalgia M54;
- Promjene na kičmenom stubu u vidu okoštavanja, skolioze, kifoze, promjene u vidu bubrenja intervertebralnog diskusa ali bez pucanja istog/Spondylosis M47;
- Lumboischialgia M54.4;

- Bolovi i trnjenje u rukama zbog spazma mišića u gornjem dijelu leđa;
- Osteoporoza bez patoloških preloma M81;
- Bolovi u više zglobova/Polyarthralgia, polyarthrosis M15;
- Bolovi u predjelu tetiva i pripoja mišića/Enthesopathia M77, M65.

Četvrta kategorija

- Stabilna angina pectoris gdje je nakon koronarografije određeno dalje liječenje medikamentima (nije indikovano operativno liječenje)/Angina pectoris I20;
- Implantiran pacemaker Z95.0;
- Preležano zapaljenje srčanog mišića ili perikarda/Miocarditis, Pericarditis I40 (ako postoji oštećenje srčane funkcije u smislu oslabljene kontraktilnosti, može u višu kategoriju);
- Šećerna bolest sa inzulinom u terapiji, bez komplikacije/DM tio 2 E11;
- Inflamatorne bolesti crijeva tipa Kronove bolesti i Ulceroznog kolitisa K50, K51;
- Hronični hepatitis B i C koji zahtijevaju liječenje B18;
- Discus hernia cervikalne ili lumbalne kičme gdje postoji pucanje intervertebralnog diska, protruzija diska i vršenje pritiska na nerve (radiculopathia) M50, M51, G54 dokazano snimkom magnetne rezonance;
- Osteoporoza sa patološkim frakturama M80;
- Stanja nakon ugradnje proteza kuka ili koljena;
- Prelomi ekstremiteta koji su operativno liječeni;
- Proširene površinske vene sa znacima tromboflebitisa koje zahtijevaju operativno liječenje I83;
- Reumatoidni artritis M05, M06 (ako su pacijenti teško samostalno pokretni usljed napredovanja bolesti, ona može biti i peta kategorija);
- Asthma J45;
- HOBP hronična opstruktivna bolest pluća i emfizem pluća J44;
- Polinodозна struma koja je za operativno liječenje E04;
- Stenoza karotidnih arterija koja je dokazana ultrazvučnim pregledom (doplerom) i zahtijeva operativno liječenje I65;
- Epilepsija koja je kontrolisana lijekovima G40;
- Depresija F32, F33 i psihoza F20-F29 koje se liječe ambulantno (bez hospitalizacije);
- Parkinsonova bolest G20;
- TIA ili ICV (šlog ili moždani udar) bez sekvela ili sa blagim sekvelama koje ne ometaju svakodnevno funkcionisanje I63;
- Uvećanje prostate koje ometa mokrenje ili zahtijeva plasiranje urinarnog katetera ili operativno liječenje/BHP N40;
- Kamen u bubregu ili mokraćnim kanalima koji ne može spontano da se izbaci već zahtijeva hiruršku intervenciju/Nephrolithiasis et ureterolithiasis Colica renalis N20, N23.

Peta kategorija

- Infarkt miokarda ili koronarografijom dokazana zapušnja koronarnih arterija gdje je bilo neophodno ugraditi stent ili bypass I21, Z95.5;
- Operacija srčanih zalizaka ili čekanje na istu;

- Operacija aneurizme aorte I71;
- Plućna hipertenzija I27;
- Šećerna bolest tipa 1 ili tipa 2 na inzulinu sa komplikacijama u ketoacidoze, bubrežnim komplikacijama, očnim, neurološkim, promjenama na krvnim sudovima srca, mozga i perifernim krvnim sudovima E11.1, E11.2, E11.3, E11.4, E11.5, E11.6, E11.7;
- Bubrežna insuficijencija N18;
- Discus hernia cervikalne ili lumbalne kičme sa stenozom spinalnog kanala, padom stopala, nemogućnošću kontrolisanja sfinktera M50, M51, M48;
- Degenerativna oboljenja zgloba, kuka i koljena koji su na listi čekanja i jako teško pokretni/Coxarthrosis M16 i Gonarthrosis M17;
- Epilepsija tipa grand mal (tonično klonični grčevi) ili nekontrolisana lijekovima G40;
- Infarkt mozga ili krvarenje u moždano tkivo koje je dovelo do hemiplegije (nepokretnost polovine tijela) ili paraplegije (nepokretnost donje polovine tijela) I63, I69;
- Depresija i psihoze koje se liječe hospitalno;
- Multipla skleroza sa čestim recidivima bolesti i hospitalizacijama G35;
- Tromboza dubokih vena nogu i ostalih vena I82, plućna embolija I26;
- Insuficijencija arterijske cirkulacije na ekstremitetima, koja zahtijeva operativno liječenje I77 (i amputacije);
- Amputacije ekstremiteta zbog povreda, infekcija, posljedica dijabetesa;
- Slabovidnost (kao posljedica oštećenja očnog živca, očnog pritiska, komplikovane katarakte u ranijim godinama, dijabetesa.

Šesta kategorija

- Srčana insuficijencija sa jako oslabljenom srčanom funkcijom (mala EF ejectiona frakcija) CMP decompesata I42, Insufficiencia cordis I50;
- Respiratorna insuficijencija sa korištenjem koncentratora kiseonika J96;
- Dijaliza (peritonealna ili hemodijaliza) Z99.2;
- Svi maligni karcinomi, bilo kojeg sistema organa, sa operativnim liječenjem, hemio i radioterapijom;
- Benigni tumori mozga koji se usljed komplikacija tretiraju kao maligne bolesti (povećanje intrakranijalnog pritiska, neurološki ispadi, operativno liječenje);
- Demencije gdje ne postoji mogućnost samostalnog funkcionisanja oboljelog lica (Alzheimerova bolest, vaskularna demencija...) F00, G30.

Instrukcije za utvrđivanje maksimalne visine pomoći po ovoj klasifikaciji:

- I kategorija: maksimalna visina pomoći – 1 prosječna plata u BiH;
- II kategorija: maksimalna visina pomoći – 2 prosječne plate u BiH;
- III kategorija: maksimalna visina pomoći – 3 prosječne plate u BiH;
- IV kategorija: maksimalna visina pomoći – 4 prosječne plate u BiH;
- V kategorija: maksimalna visina pomoći – 5 prosječnih plata u BiH;
- VI kategorija: maksimalna visina pomoći – 6 prosječnih plata u BiH.

NAPOMENA: Uzimaju se u obzir prosječne neto plate zvanično objavljene od strane Agencije za statistiku BiH u momentu odlučivanja o zahtjevu podnosioca.

PRILOG 2 – KRITERIJI EGZISTENCIJALNE UGROŽENOSTI

Nezaposlenost:

- u trajanju 1-3 godine: maksimalno 1 bod;
- u trajanju od 3-5 godina: maksimalno 2 boda;
- u trajanju 5-10 godina: maksimalno 3 boda;
- u trajanju preko 10 godina: maksimalno 4 boda;

Prihodi od rada, imovine ili iz drugih izvora na mjesečnom nivou u posljednjih 6 mjeseci:

- 0,00-100,00 KM: maksimalno 3 boda;
- 100,00 KM do 200,00 KM: maksimalno 2 boda;
- preko 200,00 KM, do visine najniže penzije na nivou BiH: maksimalno 1 bod.

Rješenje o invalidnini:

- ukoliko postoji: 1 bod.

Broj izdržavanih užih članova porodice:

- 1 član: maksimalno 1 bod;
- 2 člana: maksimalno 2 boda;
- 3 i više članova: maksimalno 3 boda.

Instrukcije za utvrđivanje maksimalne visine pomoći po ovim kriterijima:

- Vrijednost jednog boda određena je u visini jedne prosječne neto plate u BiH, prema zvanično objavljenim podacima od strane Agencije za statistiku BiH u momentu odlučivanja o zahtjevu podnosioca;
- Maksimalan broj ostvarenih bodova po zahtjevu je 6 (šest).